

四庫全書

史部

欽定四庫全書

皇朝通志卷二十九

地理畧

六

水道二

黃河

黃河源出崑崙山在今回部極西境有三源一為喀什噶爾河出喀什噶爾城極西之哈喇庫勒迤北兩水合流南注東會支河經城東流計千餘里

一為葉爾羌河出葉爾羌城西南山內紆折出山
分流經城左右復合亦千餘里會喀什噶爾河一
為和闐河出南山二源分流名玉隴喀什河哈喇
喀什河夾額里齊城而北合流數百里與喀什噶
爾河葉爾羌河會東流有阿克蘇河源出北山名
托什干河經烏什城北迤南至阿克蘇城南又南
流來會遂名塔里木河東流有木素爾河源出北
山西南流又東過拜城又東過賽刺木城合庫車

之赫色勒河過沙雅爾城北來會又東流有海都
河源出北山之裕勒都斯經哈喇沙爾城西滙為
博斯騰淖爾自淖爾流出經庫隴勒境來會又東
滙於羅布淖爾而伏即古所謂鹽澤蒲昌海也河
水伏流千餘里東南有孔道斜直青海之西境重
發於巴顏喀喇山噶達素齊老之上涌為天池水
色獨黃流為阿勒坦河三百餘里入於鄂郭淖爾
即元史所謂星宿海也東南流出注於札楞淖爾

又東南注於鄂楞淖爾又折東南流始名黃河又
東南流經阿木奈瑪勒占木遜山之南亦名大雪
山即禹貢導河之積石也其南有三昆都倫河一
曰得特昆都倫一曰多木達都昆都倫一曰道喇
昆都倫三河先後來注之折而轉西北流繞大雪
山之北又折東流經庫庫淖爾之南庫庫淖爾即
青海也有恰克圖河魁屯西里河碩爾渾河來會
又東北入甘肅河州歸德所邊

臣等謹案古言河出崑崙莫詳其地史記漢書言張騫窮河源河出葱嶺一源出于闐伏於鹽澤重出於積石鄯道元水經注因之但言之未能詳盡論者疑為荒邈不經元篤什窮源得之於星宿海反以今大雪山為崑崙而以河源為在崑崙之西仍訛踵謬習傳不察乾隆四十七年

皇上命使告祭河神務窮真源始知河之重源在星宿海西三百餘里噶達素齊老之上天池瀆涌水色

獨黃流為阿勒坦河為黃河重發之明證而崑崙
在回部極西在今實為版圖之內故喀什噶爾葉
爾羌之西巨嶺綿亘千有餘里即古之葱嶺二源
交發所謂河出葱嶺也和闐即于闐所謂一源出
于闐也葱嶺及和闐南山岡巒橫接實崑崙之支
體即爾雅所云河出崑崙墟也羅布淖爾之伏阿
勒坦河之重見稽圖勘蹟瞭如指掌元人誤以大
雪山為崑崙者以河經其地有三昆都倫河來入

因字音之近而妄指之其舛甚矣伏讀

聖製河源詩讀宋史河渠志文河源簡明語

切指前古相傳之誤並

命儒臣纂輯河源紀畧

諭旨煌煌原委秩然大河靈蹟至

聖代而始論定謹稟承載述一洗從前各志之舛畧云

黃河入河州有青海南境諸水來會過小積石山

經蘭州府西有大夏河即古灘水來會又東有洮

河來會

洮河
見後

又東有湟水來會

湟水
見後

又東有莊浪

河來會又東循長城經金縣境有浩尾河來會又

北有會寧安定二縣水來會出長城又東南流入

折東北有清水河自固原州來會又經靈州北東

北經寧夏府境又東北出邊經河套鄂爾多斯部

地分流復合折東南經烏喇特部境又東南有黑

河自歸化城境來會南流入山西平魯縣邊界自

此而南出河套東岸為山西境西岸為陝西境經

河曲縣西府谷縣東又經保德州東竒嵐州西又
經神木縣東興縣西有蔚汾水自嵐縣經興縣來
會又經葭州東臨縣西過孟門鎮又經永寧州西
吳堡縣東有白泉河即古離石水自永寧州合寧
鄉縣諸水來會折西南經清澗縣東有榆林水合
米脂縣綏德州諸水及奢延川來會又經石樓縣
西延川縣東又經永和縣西延長縣東有延水自
延安府來會又南經大寧縣西有所川合隰州蒲

縣大寧縣諸水來會又南經宜川縣東吉州西其南為壺口山又南有汾川水合銀川丹陽諸水來

會又東南經鄉寧縣西韓城縣東其東岸為河津

縣之龍門山西南流有汾水來會

汾水見後

又經邵陽

縣東臨晉縣西又經朝邑縣東蒲州永濟縣西有

涑水自絳縣聞喜縣合安邑解州猗氏臨晉諸水

來會又南經朝邑縣南有洛河來會

洛河見後

又經華

陰縣東有渭水來會

渭水見後

折東流至潼關南岸入

河南閩鄉縣境又東經芮城縣南又經靈寶縣北
有宏農河來會又經陝州北平陸縣南又東過底
柱山經澠池縣北垣曲縣南有清水出絳縣沔水
出王屋山來會又東北岸亦入河南界經新安縣
北濟源縣南又經孟津縣北孟縣南又經鞏縣北
有濟水自北來會濟水見後又經溫縣南鞏縣北又經
汜水縣北有洛水來會洛水見後又東北有豬龍河來
會豬龍河見後又東南有沁水來會沁水見後又經滎陽縣

北又東經滎澤縣北原武縣南鄭州北又經陽武
縣南中牟縣北又經延津縣南祥符縣北封邱縣
南陳留縣北又東南經南陽考城縣北又東入山
東界經曹縣南又東經單縣南又東南流入江南
界經碭山縣北豐縣南蕭縣北沛縣南又東南經
徐州府城北又經邳州南睢寧縣北又東經宿遷
縣南桃源縣北又東南至清河縣南即清口淮水
洪澤湖水來會

淮水
見後

東北流經山陽縣之清江浦

北經阜寧縣北安東縣南又東北過雲梯關入於海

臣等謹案禹貢舊河道自積石以下至今滎澤縣與今水道並同滎澤以下自原武縣北東逕陽武延津二縣北新鄉汲縣南又東北至濬縣西南大伾山在焉折北行經內黃湯陰安陽會漳水經臨漳大名成安肥鄉曲州平鄉廣宗至鉅鹿古大陸澤在焉又北經南宮新河冀州東鹿深州衡水武

邑武強阜城獻縣交河青縣靜海大城寶坻至天津直沽口入於渤海

入河諸水

洮河源出洮州廳西南邊外之西傾山東麓入邊經洮州廳南岷州西北又東北經舊臨洮府南又北有三岔河自邊外來會西北流至蘭州府西境入黃河

湟水即洛都水源出西寧府西北邊外當青海之

東東流入西寧邊有北川河即古破羌水南川河
即古六谷水並會東南流經碾伯縣至大通縣與
大通河會大通河即古浩疊水源出青海之西北
境包青海而東合甘州府之滿楚客河東南流經
大通縣來會又東南入黃河

汾水源出靜樂縣北管涔山南流合碾河又南有
嵐河自嵐縣來會東南流經太原府陽曲縣西又
經太原縣西有晉祠水來會又南有榆次縣水來

會經徐溝縣北有洞澗水自樂平縣合壽陽縣平
定州徐溝縣諸水來會經交城縣南有祁縣水來
會又西南有文水來會又西經平遙縣西汾州府
汾陽縣東又經孝義縣東又西南經介休縣北有
中都水自遙平縣來會經靈石縣南又西南經汾
西縣東折東南經霍州西又經趙城縣西有羸水
霍水自霍山來會又經洪洞縣西又經平陽府臨
汾縣西北分二派一經襄陵縣南一經縣西屈曲

復合又西南經太平縣東曲沃縣北又經絳州城南有澮河自翼城曲沃縣來會又經稷山縣南河津縣南又西南至滎河縣北入黃河

北洛水即古漆沮源出慶陽府安化縣北境東南流經保安縣西南曰洛河又東南經安塞縣南甘泉縣北又南經鄜州東折西南經洛川縣西又南經中部縣東有華池河自合水縣合清水河來會又南有沮水自中部縣來會經宜君縣北又經白

水縣東澄城縣西有白水大浴河來會又經蒲城
縣東朝邑縣南入黃河

渭水源出渭源縣西烏鼠山東南流經鞏昌府隴
西縣北又經寧遠縣北有漳河來會又東北有桃
花山水自通渭縣來會經伏羌縣北有華川水來
會經秦安縣西南秦州北有羅玉河自靜寧州來
會又東南有秦州河來會經清水縣南又東經隴
州南境又東經寶雞縣西又東經鳳翔府鳳翔縣

南境有沂陽河即古沂水自隴州來會經岐山縣
南扶風縣西又經郿縣北武功縣南又經盩厔縣
北有黑水來會其北岸有鳳翔岐山扶風諸縣水
來會稍東有赤水自終南山來會經興平縣南鄠
縣北咸陽縣東有豐水自鄠縣合瀉水潯水東北
流來會經西安府長安縣北咸寧縣北高陵縣南
有涇水來會涇水
見後稍東有灊水自藍田縣澇水自
高陵縣來會又經臨潼縣北有淳化河清峪河自

淳化縣經涇陽三原高陵諸縣合耀州之沮水宜
君縣之漆水過富平縣來會又經渭南縣北又東
經華州西北又東北經同州府大荔縣南華陰縣
北有水自太華山來會又東北入黃河

涇水源出平涼府西北笄頭山經府城北又經華
亭縣東北崇信縣北有汭水自隴山來會又東北
有鎮原縣水來會經長武縣北有盤口河自涇州
來會稍南有馬連河自慶陽府合環縣合水寧州

正寧諸水來會又南有黑水河自靈臺縣來會經邠州北有溫涼河來會經永壽縣東北有大谷鎮水來會經淳化縣西又經醴泉縣東北有水自乾州來會經涇陽縣南又經高陵縣南會渭水

洛水即豫州川源出陝西商州雒南縣西冢領山經縣北東入河南界經盧氏縣南熊耳山北又經永寧縣南宜陽縣北又東北經河南府洛陽縣西南有澗水合穀水自澠池新安縣來會又東經府

城南有瀍水自北來會又經孟津縣偃師縣南有伊水自盧氏縣經嵩縣伊陽宜陽洛陽諸境來會又東北經鞏縣汜水縣入黃河

濟瀆源出懷慶府濟源縣西北與山西垣曲陽城接界之王屋山即禹貢沅水也經濟源縣北分二派一經鞏縣西北境入河一東流為豬龍河經府城南又經溫縣北又經武陟縣南入黃河其南岸為滎澤東為滎陽即禹貢溢為滎地自西漢末不

復溢為滎也

沁水源出山西沁州沁源縣北之綿山東南流經縣南又南經屯留縣西岳陽縣東又南經沁水縣東有海河來會又東南經澤州府城西北陽城縣東有澤河來會又南入河南界經懷慶府北境有廣濟河支津來會又北有大丹河水自潞安府經高平陵川鳳臺諸縣合諸水來會又東經溫縣北至武陟縣東入黃河

淮水

淮水出河南南陽府桐柏縣西南之桐栢山東南
流經湖北隨州北界又折而北經桐栢縣東折東
流經信陽州北正陽縣南羅山縣北有潁河自信
陽州來會經息縣南有小黃河自羅山縣來會又
東分二派合於光州西北又東經固始縣西北有
南汝水來會南汝水見後南有光山縣水來會又東北
有曲河自商城縣史河自固始縣來會又東北入

江南界經潁州府阜陽縣南南汝水支津來會東
南流經霍邱縣北潁上縣南有澧河來會又東南
有淝河自霍山縣經六安州來會折東北經壽州
西有沙河合汝水潁水來會沙河汝水潁水見後又東北有
東肥河來會又東北有芍陂沿河水來會又東北
有廬州府北水來會經懷遠縣南有渦河亦名西
肥河自河南太康縣鹿邑縣經江南亳州分二支
一經太和縣潁上縣至壽州來會一經柘城縣鹿

邑縣過亳州蒙城縣懷遠縣來會又東北有北肥河自宿州來會又東有龍子河自鳳陽府鳳陽縣來會又東經鳳陽府北又經五河縣南有澮河水自河南永城縣分支經宿州來會又東有沱河自羊城湖來會分二支一東北為潼河一東流復合有池河自定遠縣來會又東經盱眙縣北泗州南東北滙為洪澤湖湖之西北有睢河自碭山蕭縣宿州靈璧睢寧來注之其西北為桃源縣境南岸

迤西北為高家堰北岸為清河縣境為全湖之委
北流至清口黃河自西來會東北並流入於海

臣等謹案淮源出桐栢其中峰曰胎簪山絕頂有
大石盤陀廣十餘畝凹處成潭泉從石間出或伏
或見即禹貢導淮之桐栢也詳

御製淮源記謹識以見考古之精覈焉

入淮諸水

南汝水源出遂平縣西南境之洪山龍陂東北流

經縣城南又東經上蔡縣南汝陽縣北又東南有
小沙河自確山縣來會又東南有吳寨河自泌陽
縣經確山正陽縣來會又東南經新蔡縣東有洪河
自西平上蔡縣來會經固始縣西北入於淮其分
一支經江南潁州府界亦入於淮

沙河即古潢水源出魯山縣西境東流經縣南又
東經寶豐縣南葉縣北有輝河來會經舞陽縣東
北有汝水來會

汝水
見後

又東有濃河自舞陽縣經葉

縣郟城來會又東經上蔡縣北又東至商水縣西

北有潁水滎陽水來會

潁水滎陽水見後

折東南流至陳

州府南分二支一南流為項城北沈邱南之渦河

有汾河自西北經項城縣來會又東南入江南界

經太和縣西潁州府北會北支一為沈邱北之沙

河東北流入太和縣西北折東南至潁州府北有

茨河來會又東南與渦河合又東南經潁上縣北

又東南入於淮水

汝水源出嵩縣西南南陽府北界山東流經縣南之伏牛山即天息山又東北經伊陽縣南又東北經汝州城南又東南經寶豐縣北郊縣南又東南經襄城縣西南又東南會沙河

潁水源出登封縣北少室山南流經縣西折東南經密縣南禹州北分二派一東北流經新鄭長葛縣過許州至臨潁縣一東南流經襄城縣過許州至臨潁縣而合又東南有渚河自汝州經襄城臨

潁縣來會又東流至商水縣西北會沙河

滎陽水源出鞏縣汜水縣南東北流經滎陽縣東折而東曰索河又東有京河來會經滎澤縣南鄭州北有東京河來會又東南有磨河來會名小賈魯河又東南經中牟縣北又東南經開封府西南又南經通許縣西尉氏縣東又東南至扶溝縣北有雙泊河自密縣經禹州新鄭長葛鄆陵諸境來會又東南經西華縣北又南至商水縣會沙河

山東諸水

大清河自東平州東之戴村壩西分洩汶河之水
合沙河西北流經州城西南有水自城北來會經
東阿縣西東北流經平陰縣西北又東北經長清
縣北又經齊河縣東南有王符河自厯城縣來會
又東至濟南府城北有趵突泉水即古灤水自府
西南來會又東經濟陽縣東又東北有繡江河自
章邱縣來會又東北經齊東縣西又經青城縣北

又經濱州南蒲臺縣北又東北經利津縣東南入於海

小清河源出章邱縣東南北流有水自鄒平縣來會折東北經澚山泊曰小清河經新城縣西北有孝婦河自萊蕪臨淄長山縣來會又東經高苑縣南又經博興縣南有烏河即古時水自臨淄新城高苑來會又經樂安縣北又東北入於海

臣等謹案大清河小清河即古濟水故道濟水勁

疾往往穴地伏流瀆湧四出即遷徙分合亦復不定然經流大概及其迭隱迭見之性則千古未有異也今考河南濟源縣之濟瀆即濟水發源之始惟以既入於河而自漢以後不復見其溢而為榮之跡故列於入河巨川之內至今大清河所歷皆古濟水所經而小清河入海之口正禹貢入海故道世儒疑伏見之說為難信而以濟水為絕流已久不知濟水之所以別於他水者正因伏見不常

故蹤跡靡定而經流所在自行入海故蹟仍自顯然伏讀

御製濟水考辨明濟瀆之本性指示禹貢之恒道四瀆之一始可證其原委今謹載二清河現在實跡古道之離合蓋可考見焉

汶水源出萊蕪縣東北西流經縣城西北有年汶水來會又西有會河諸水來會又西遠泰山支麓經泰安府南有泮河水自濟南府來會折南流有

汶河自新泰蒙陰經泰安縣來會經寧陽縣北又
經汶上縣北有淨泉水自東平州來會又西南至
汶上西南境之南旺分流南北置二閘南並蜀山
湖北貫馬踏湖為運河水脊

運河
見後

泗水源出泗水縣東西流經縣城北折西南至曲
阜縣東北有嶮河來會又西南至兗州府東北分
二支一穿府城至濟寧州入運河一經城東有雩
河出尼山下經曲阜縣城來會西南流有白馬河

自鄒縣來會又西南入於運河

沂河源出沂水縣西北經縣城西折而西南有東汶河自蒙陰縣來會南流至沂州府東北有祊河自費縣來會又南有涑河亦自費縣來會又西南經郟城縣西又西南入江南邳州界有涑河支津來會又西南分三派其二支先入運河一支滙為駱馬湖於湖之南入運河

淄水源出淄川縣西南東北流經臨淄縣東又北

經樂安縣東南又東北入清水泊有北陽河自青州府治益都縣經壽光縣西至樂安縣東南入清水泊由泊東北入海

瀾河即古巨洋水源出臨朐縣南北流經益都縣東南有陸康河季家河來會又東北有南洋河自青州府來會經壽光縣東南有大丹河小丹河自臨朐縣昌樂縣來會又東北入海

于河即虞水出昌樂縣東南經濰縣西有小于河

來會又東北有白狼支津來會又東貫長泊而北入於海

白狼河源出昌樂縣南東北流經濰縣東分二支一會于河一東流有東于河來會又東北經長泊南入於海

濰水俗曰東淮河源出莒州北東南流至諸城縣西又東有福山水來會折西北有大浯河小浯河來會經安邱縣東有東汶河自沂水縣來會經濰

縣東至昌邑縣東南又東北入於海

北膠河源出膠州西北經高密縣東入百脈湖有分水嶺北水來會北流有藥石河自平度州來會又西北至昌樂縣東又北入於海

南膠河出高密縣分水嶺南東流有白沙河自平度州來會折東南經膠州北有大沽河合小沽河來會又南入於海

運河

臣等謹案運河以汶水南旺為上源北至天津南至黃淮近地水泉無數無不引為便漕之用茲謹敘載河道經由之州縣及所引之諸水用誌大畧而江南運河亦以次類著焉

運河自山東汶上縣南旺北流經鄆城縣東北東平州西南境西北流有魏河自直隸開州經清豐縣入山東濮州經范縣壽張縣來會西北流經壽張縣東陽穀縣西北流經聊城縣南又北經東昌

府城東又北經堂邑縣東北又經博平縣西北清

平縣西又北經臨清州城有衛河來會河勢始盛

自此以下不復置閘

衛河見前卷

北流經夏津縣西直

隸清河縣東東北流經武城縣西南又東北經直

隸景州東境又經東光縣西又北經南皮縣西又

東北經滄州西北又東北滹沱河合漳河來會

滹沱

河漳河

見前卷

北流經青縣東靜海縣西又東北至天津

府城北白河與桑乾諸水來會

白河桑乾河見前卷

又東南

至大沽入海漕舟至天津即溯白河以達於

京師

運河自南旺南流並蜀山湖隄經嘉祥縣東北境
又南至濟寧州西南有府河即泗水支流自兗州
府合汶上縣之光河來會又東南泗水來會

泗水
見前

經魚臺縣東北並昭陽湖隄有界河自滕縣來會
經滕縣西有荆溝河來會又東南有濬河來會又
東南經江南沛縣東北界又東經沛湖口有玉花

河來會又東經山東嶧縣西界有盤龍河來會又

東南經微山湖口北又東經嶧縣南境有巨龍河

自費縣來會又東南入江南邳州西北界有沭河

自費縣來會又南有沂河支津二來會又東南沂

河東派滙駱馬湖來會

沂河見前

又經宿遷縣東北其

東分一派為鹽河經沭陽縣入碩項湖至海州入

於海運河經桃源縣北又經清河縣北其東又分

一派經安東縣北會碩項湖入於海運河即於清

河縣東南入黃河其西南即清口黃河淮水交會之處東入於海運河分淮水一支東流折東北經清江浦前東南流經淮安府城西其東岸洩水支河口為澗河為射陽湖又南流東岸為涇河為廣洋湖又南經寶應湖北口東岸有洩水支河入廣洋湖又經寶應縣西西岸濱寶應湖東岸皆有洩水支河又南經高郵湖東又南經高郵州城西又南經邵伯湖東又南東岸并有洩水支河折西南

經揚州府城東分二派一南流又分支津先後由瓜洲入江一西南流經儀徵縣東北又經城南西南流入於江

運河自鎮江府丹徒縣西北之京口經府城西南有支港入於大江又東南經練湖東經丹陽縣西北分繞城之左右而南分一支入於大江又南有南運河自溧陽金壇合長蕩湖支津及太平府來會又南有丁義河白鶴溪自金壇縣來會又東南

分一支曰孟河入大江至常州府西北分二支曰
橋河曰新園河入大江有長蕩湖支津自宜興縣
來會分一支經江陰縣入於大江又東分一支曰
曹港河通江陰常熟崑山太倉諸境運河經無錫
縣西北分一支經江陰會諸水入大江又南有湖
埭鎮水自溧陽宜興金壇來會經無錫縣城又南
分一支為二派通常熟崑山諸境又南經滸墅關
有光福河自太湖來會又東南至蘇州府城分絡

左右而南有木瀆河自太湖合石湖諸渠來會城
東南北三面支港縱橫屬縣並達經吳江縣北而
東貫吳淞江又東南有松江府河來會又南有溪
河即湖州府運道東北流來會入浙江界經秀水
縣北有水自烏鎮南通桐鄉西通湖州府來會其
東有支渠達嘉善縣及松江府又南至嘉興府城
北分絡左右而南有支渠通屬縣境經桐鄉縣東
南有長水塘接海寧海鹽二縣又西南有桐鄉河

來會經石門縣城南有河自德清縣來會又西南
至長安鎮有支河通海鹽平湖嘉善達於杭州又
經德清縣東境至仁和縣北而海寧德清餘杭諸
水皆會過北新關至杭州府城之北

皇朝通志卷二十九

欽定四庫全書

皇朝通志卷三十

地理畧

七

水道

三

江水

臣等謹按南紀大川以江水為最鉅其所經由之
域及包納諸水綿亘四川雲南貴州湖南湖北江
西安徽江蘇七省之地與河水同稱巨瀆謹考禹

貢岷山導江在今四川松潘廳邊外崇山千里皆
為岷江本源至其西南一源稱金沙江者則自西
藏衛地發源經喀木諸境入雲南以合於四川其
未入邊之前已四千里從來地志未能詳載恭
惟我

聖朝德威廣被西藏山水久入版圖伏覩

欽定輿地全圖

欽定大清一統志西藏江源有喀七烏蘭河布賴楚河

巴楚河諸名道里曲折皆可縷述足以補從前志
書叙江源者之所未及茲謹述岷山江源於前而
以西藏諸川為大江之西南源者載於篇中以紀
其實自是而涪江漢水洞庭湖鄱陽湖諸水之入
江者均以次條載焉

大江源出四川松潘廳邊外之岷山羊膊嶺有二
源合流入邊界黃勝關內至漳臘營有一水來會
經歷東南有茂州鐵豹嶺水來會又東南經茂州

城西北又西南經保縣西北汶川縣西又東南經灌縣西北有納凹河三江口河來會又東南曰灌口曰湔江分為二派一支東流為沱江經郫縣新繁成都新都金堂南經簡州資陽資州富順至瀘州復合於江一支正南流又分二派經崇慶州而合又東南有自溫江縣分出之水來會經新津縣東北又南流有自崇慶州分出之水合大邑邛州蒲江諸水來會又東南有沱江支渠環成都府城

西流來會又南經彭山縣東眉州城東又西南有
仁壽縣水來會又南經青神縣東南有新磨河自
丹稜縣來會又南有金牛河自夾江河來會又南
出重山至嘉定府東北有尼溪自井研縣竹公溪
自樂山縣來會至府西南有陽江即大渡河自灌
縣大邑縣經美諾阿爾古境又南會打箭爐之瀘
河又東南會越雋廳河經峨眉縣西南會青衣江
入於大江青衣江由蘆山縣經雅州府西會榮經

縣水經名山縣南洪雅縣南夾江縣西峩眉縣東
會三峩水至嘉定府西合陽江以入於大江大江
東南流至犍為縣北又東南經敘州府北又東南
有金沙江來會此禹貢之岷山江源也 金沙江
即古麗水亦曰繩水曰犂牛河出西藏衛地之犂
石山東北流有喀七烏蘭水來會又東北有拜都
河來會又東南會諸水無數行二千餘里入喀木
境名布賴楚河又東南千餘里名巴楚河又東南

六百餘里入雲南麗江府西北邊界折東北始名
金沙江有無量河合里楚河自永北廳來會又南
有漾共江自鶴慶州來會又東經賓川州北有三
道河峇旦河來會經姚州北有泡江自雲南縣來
會經大姚縣北又東北有大羅河自永北廳來會
又東有鴉龍江自北來會鴉龍江即古若水又名
打沖河源出西番裏塘城西北山中曰雜楚河東
南流合諸水無數行千三百餘里至打箭爐邊外

始名鴉龍江南入四川瞻對土司界又東南有一水亦名打沖河即古瀘水自雲南順寧府來會東流有鹽井河來會東南流經永昌府西南境有安寧河自冕寧縣合諸水來會折西南入金沙江金沙江東南流東北為四川界西南為雲南界有大姚河自姚州來會經武定州西北有龍川江自鎮南州經楚雄府定遠廣通縣合諸水來會經武定州北有武定州水四川會理州水並來會又東北

有普渡河自雲南府治昆明縣之滇池滙呈貢縣
晉寧州昆陽州諸水北流會安寧州富民縣及武
定州祿勸縣諸水來會東北入東川府界有玉虹
河會通河自會理州來會又東北有小江自尋甸
州來會又東北有以禮河自東川府來會又東北
有雲南貴州界上水來會經昭通府西北有馬湖
水來會又東有橫江自昭通府經四川筠連慶符
縣來會又東北經敘州府城東會岷江此大江之

西南源也 大江東北流有福溪自富順縣來會
經南溪縣西南有安寧江合珙縣長寧興文諸縣
水來會經江安縣北納溪縣西有納溪自永寧縣
及貴州之永寧州來會經瀘州城南前自灌口分
出之沱江合綿竹縣德陽縣之綿水石亭江什邡
縣之白魚河漢州之雒水資陽縣之楊花溪仁壽
縣之珠溪富順縣之觀音河榮縣之榮河隆昌縣
之隆橋河先後合流來會東南流經合江縣北有

赤水河自鎮雄州經貴州之畢節縣入四川境合
桐梓縣水仁懷廳水來會又東北有大麓溪自縉
昌縣來會又東北有洙溶溪自永川縣來會又東
北有油溪自璧山縣江津縣來會經江津縣西北
有綦江自桐梓縣綦江縣來會又北至重慶府巴
縣南有涪江合白水嘉陵江渠河來會涪江嘉陵
江渠河並
見又東北有梅溪自大竹鄰水二縣來會經長壽
縣東南有龍溪河自長壽墊江二縣來會又東南

經涪州城東有黔江即烏江來會

黔江見後

又東北有

渠溪河自忠州經鄧都縣來會經鄧都縣南有葫

蘆溪自湖南界上經石砭廳來會經忠州南有滄

溪河塗井河自梁山縣來會經萬縣南有西河水

小江水來會經雲陽縣南有新軍河自湖北施南

府界來會東瀼河自開縣來會又東北有頭塘溪

自奉節縣來會至夔州府城南經八陣磧東出為

瞿唐峽經白帝城南為灩澦堆有小河鐵柱河來

會至巫山縣南有大寧河自湖北竹山縣合諸水
來會經巫峽有白古水河自建始縣來會折東南
流入湖北界經巴東縣西北而東合諸小水經歸
州城南有香溪自興山縣來會過黃陵廟經宜昌
府境至夔陵南始出峽至宜都縣北有清江自施
南府合諸水經長陽縣來會經枝江縣東北松滋
縣西南有瑪瑙河自當陽縣來會又東經荊州府
治江陵縣西南有沮河漳河自遠安縣經當陽縣

來會經公安縣東北石首縣西北至監利縣西有

支津會澧水入洞庭湖經湖南華容縣東至岳州府

治巴陵縣西北洞庭湖匯沅湘諸水來會

洞庭湖所匯諸

水見後

經臨湘縣西南有白泥湖水來會又東北有

陸溪水自江西寧州西界經通城崇陽合諸水來

會經嘉魚縣北沔陽州東南又東北有沔陽東南

諸水來會又東北有斧頭湖水自嘉魚縣合咸寧

縣水來會又北有赤野湖會沔陽太白十四湖諸

水來會經漢陽府城東南武昌府城西有東湖湯

孫湖諸水來會又北漢水自西北來會

漢水見後

經江

夏縣北黃陂縣南折東南流有武湖水自黃安縣來會經黃岡縣西北有華家河自黃安縣來會白塔河自麻城縣經黃安縣來會南流經黃州府西北有白洋湖自咸寧縣經江夏武昌縣來會經武昌縣北又東有巴河自羅田縣經蘄水縣來會折東南經大冶縣東北蘄水縣東南有浠水自江南

之英山縣來會經興國州東北有漳源湖自大冶
縣來會經蘄州北有蘄水來會又南有富水自通
山縣經興國州來會經廣濟縣西南折東北流南
岸入江西界經瑞昌縣西北有楊林湖水即潯水
來會經黃梅縣西南有縣河合廣濟縣水來會又
東南至九江府治德化縣西北亦名潯陽江北岸
為黃梅縣及江南之宿松縣界又東為湖口縣西
之湖口鄱陽湖滙章貢諸水來會

鄱陽湖章貢諸水見後經

彭澤縣西北江中有小孤山有泊湖水自彭澤來
會又北入江南境經東流縣西又經望江縣東有
雷水來會經縣東有前長河自潛山縣經英山縣
合宿松之南泊湖水來會又東北有香口河自建
德縣經東流縣來會經縣北有漳湖合上流諸湖
水來會又有皖水潛水自潛山縣經皖口來會經
安慶府治東南又經池州府貴池縣西北有張溪
自建德縣來會又東北有樅陽河自桐城縣經懷

寧縣合諸水來會又東北有池河自祁門縣來會
經銅陵縣西南有大通河自青陽縣合數水來會
經無為州南有荻港水自銅陵縣合繁昌縣南水
來會經繁昌縣西北蕪湖縣西南有石碗河自南
陵縣來會又東北有魯明江即清弋江匯旌德太
平石埭涇縣諸水經宣城縣又經蕪湖城南來會
經太平府治當塗縣西南有姑熟溪自寧國府經
當塗縣合廣德州建平高淳諸水來會至和州南

有巢湖水自廬州府合肥縣合肥之肥水舒城
之界河潛山之巴洋河及巢縣無為州諸水來會
經太平府城北之采石磯經江寧縣西南江浦縣
東經江寧府城西北折東北流有秦淮水自句容
縣合丹徒溧水縣水經上元縣東南至府城分二
派先後來會經句容縣北六合縣東南有滁河自
含山縣經全椒江浦六合來會東流經儀徵縣西
南運河分流自江都來會

見前

經鎮江府丹徒縣

西為京口運河自此南達於杭

見前

江中有金山

北岸經江都縣南為運河口即淮揚邗溝入江處

見前又東有焦山又東經泰州南丹陽縣北有九

曲河口經常州府武進縣北有連江橋河新園河

口北岸為泰興縣南又東北經靖江縣南江陰縣

北有黃田港口又東北經如臯縣南通州西又東

北經常熟縣西北又東為福山港又南經昭文縣

東北有白茅浦口北岸經餘西餘中餘東呂四諸

場之南又北至蓼角嘴與海中之崇明縣相對入於海
入江諸水

涪江出松潘廳東北之小分水嶺東南流經龍安
府治平武縣西北有白馬河來會又南經江油縣
東南又經彰明縣分流經城之左右而合有小江
河即廉讓水出平武縣經江油境來會又南有石
板河自石泉縣合諸水來會經綿州東南有茶坪
河自安縣來會又東南經潼川府三臺縣西北有

中江水自中江縣來會經射洪縣北有唐橋溪來
會又東有梓潼水自鹽亭縣來會又南有郪江來
會折東南有馬桑溪自蓬溪縣來會經遂寧縣東
又南流有關箭溪合樂至縣水安居場水來會經
合州西南有立石河自永川璧山銅梁縣來會又
東嘉陵江合渠河來會東南流至重慶府治巴縣
西北折東流入於大江

嘉陵江即西漢水出秦州西南之岷冢山山在漢

源嶠冢之西北四百餘里非即禹貢之嶠冢也西漢水西南流有橫水嶺水自西和縣來會折西流至禮縣東南又西經西和縣西北有岷峩江水來會經階州東北成縣西南有潭河來會經成縣南畧陽縣西北有黑峪江自秦州來會又東南有九龍池水自徽縣來會又南有嘉陵谷水自鳳縣經兩當縣合諸水來會始名嘉陵江南流經畧陽縣西又經寧羌州西北又南經四川廣元縣北界有

七盤關水來會經廣元縣西昭化縣東北有白水
江來會白水江即古桓水亦曰墊江出邊外洮源
東南之西傾山東南流入甘肅邊武都關南有白
龍江自岷州分水嶺東南流合諸水來會經階州
西南又經文縣北又南入四川界經昭化縣北有
黃沙江來會又東南入于嘉陵江嘉陵江西南流
有劔水自劔州來會經蒼溪縣西又經保寧府西
南有東河自寧羌州經廣元縣來會經南部縣西

北蓬州西北有西河自劔州經閬中南部縣來會
經南充縣東北有蠻子河自西充縣來會又東南
有西溪自岳池縣來會經定遠縣東北折而南至
合州東北有渠河來會又南流入於涪江

渠河為巴水渠水二源之合名巴水出陝西西鄉
縣西南之大巴山西流入四川通江縣界有洪口
河自陝西界來會又西南有西河來會至巴州東
南有南江水自陝西界合諸水經儀隴縣來會又

東南至渠縣合渠河渠河三源俱出太平縣經東鄉縣而合經達州城東有澄子河自新寧縣來會又西南有清溪河自大竹縣來會至渠縣東北有巴江來會西南流有流江河自儀隴營山二縣來會經廣安州東北至合州之嘉渠口會嘉陵江以入於涪江

黔江即烏江出貴州威寧州東北山東北流有則底河自雲南鎮雄州來會又東南伏而復出經畢

節縣南又伏二十餘里復出曰天生橋有落脚河
自大定府來會又東北經黔西州南有楊柳河以
麥河自平遠州來會又東有三岔河自安順府合
威寧州安平清鎮縣諸水來會經修文縣西北有
雞公河自廣順州合諸水來會經開州西有以濟
河自黔西州來會經遵義府南境有清水江自貴
陽府治合龍里貴定縣諸水來會經甕安縣北有
湘江自遵義府合綏陽縣諸水來會又東南有湄

潭縣水甕安縣水來會經餘慶縣西北又經石阡
府西龍泉縣南又經思南府西南有清江溪來會
經印江縣西北婺川縣東北折西北入四川酉陽
州西南界又北有南溪河自湖北施南府來會經
彭水縣南有長溪自貴州婺川界來會又西北有
中清河自湖北利川縣來會折西南有渡頭河自
綏陽縣正安州合諸水來會又西北有大溪河自
南川縣來會又北至涪州城東北入於大江

洞庭湖所匯諸水 澧水一源出湖南桑植縣境
一源出永順府西北大山一源出桑植縣之太平
鎮合流經安福縣西南又東南經永定縣南東流
經慈利縣西有九溪河自施南府東境宣恩縣會
長樂縣之霧江經安福縣來會東流有鐵水河自
長樂縣來會經石門縣南又東經澧州城南分為
二派一東北流有大江支津自江陵縣西南合三
岡湖諸水自公安縣來會一支東南流合石門縣

之道溪水東流又分數支至安鄉縣西北羣流並
合有從河自常德府武陵縣來會又東分為二派
一東南流入洞庭湖一東北流合公安縣東北之
白蓮湖水至華容縣西南境入洞庭湖

沅水一源曰澗水即鎮陽江出貴州平越府東北
經施秉縣南又經鎮遠府城南而北又經思州府
南有思州河來會經玉屏縣西南有戶溪江自思
州府來會折東南入湖南沅州府芷江縣西南界

又經黔陽縣北有清水江自貴州平越府之猪梁
江都勻府之馬尾河合諸水及靖州之渠河來會
既合清水江東流有竹舟江自綏寧縣合城步縣
諸水來會又東北經辰谿縣東南有雙龍江即淑
水自淑浦縣來會又有麻陽河即辰水自銅仁府
來會經瀘溪縣東南有武溪自乾州來會北流有
藍溪自辰州府沅陵縣來會至府城西南有酉水
自四川酉陽州合諸水來會又東北有馬底河自

沅陵縣來會又東北經桃源縣東南又經常德府
武陵縣南又東分數支經龍陽縣北而合又東北
入洞庭湖

湘水源出廣西桂林府興安縣南曰海陽江北流
分為二復合有六洞山水自湖南城步縣來會又
東北始名湘江經全州城西南有羅江自湖南新
寧縣界來會有灌水自灌陽縣來會又東北入湖
南界經東安縣東南有右江來會經永州府治零

陵縣西北有瀟水自道州合永明江華寧遠三縣
諸水名曰泥江經府城西來會北流經祁陽縣西
有盧洪江自東安縣來會經常寧縣北有舂陵水
合歸水自藍山嘉禾新田桂陽州來會經衡州府
治衡陽縣東南有烝水來會北流有郴江自耒陽
縣合桂東桂陽興寧郴州永興諸水來會經衡山
縣南有洙水合攸水自酃縣茶陵州攸縣及安仁
縣之小江來會又北有水自衡山來會又東北有

淶江合泗汾河自醴陵瀏陽合江西之萍鄉萬載
縣諸水來會經湘潭縣東南有漣水自湘鄉縣來
會經長沙府治善化縣西南有瀏陽河自瀏陽縣
來會稍北有黃泥江自東北來會又北有瀉河自
寧鄉縣來會又北有資江自益陽縣合武岡州新
寧邵陽新化安化諸縣水分支經湘陰縣沅陵縣
先後入洞庭湖其正支東流來會經湘陰縣西南
有汨水自平江縣合諸水分流來會湘水分二派

復合入洞庭湖

洞庭湖亘岳州常德荊州澧州三府一州巴陵臨湘監利沅江益陽龍陽安鄉華容八縣周圍八九百里至岳州府西北入於大江

漢水即漾水源出寧羗州北之嶠冢山即禹貢導漾之嶠冢也經沔縣西南有沔水合澧水沮水來會經褒城縣南有黑龍江自郿縣合斜谷水褒城水來會經漢中府治南鄭縣西南經城固縣南有

馬扈河鐵台河來會經洋縣南有潛水來會有沙河自西鄉縣來會南流有洋河合木馬河來會經石泉縣西南又經紫陽縣西有渚河自四川太平縣來會又東有香河自平利縣來會經興安府西有越河自安康縣黃羊河自平利縣來會經洵陽縣南有洵河自鄠縣經長安縣合鎮安縣水來會東流有吉水河自湖北鄖西縣來會經白河縣城北又東入湖北鄖陽府界經鄖西縣南有隄河即

堵水自竹溪竹山二縣合諸水來會經鄆縣西至
均州西北有曾河來會又東南有丹河自河南淅
川縣合陝西商州山陽商南縣諸水來會經光化
縣西南穀城縣東南有南河自房縣合保康縣水
來會經襄陽府北樊城南有白河即濁水唐河即
涓水自河南新野合南陽府諸縣水鄧州諸水及
棗陽縣之滾河來會經宜城縣東有蠻河即鄆水
自南漳縣來會經安陸府鍾祥縣北經荊門州東

南又經京山縣西南潛江縣北有支津交滙為雲

夢澤

見後

漢水正派自大澤口東北流又分支津經

潛江縣東北滙為沔陽北湖其正派東南流又分
二派北派經天門縣南合松湖支津水南派經沔
陽州北又分支津為白泥赤野諸湖又東北流與
北派合過漢川縣南有松湖支津水來會又東有
澁水瀆水自隨州合德安府雲夢應城諸縣水來
會經漢陽府治西北有赤野湖水來會又東北有

三里河自應山縣經孝感縣來會折東南至大別山麓入於大江

雲夢澤跨江南北蓋八九百里自枝江而東為松滋為公安為石首為華容濱江南岸多藪澤即所謂江南之夢也江北尤巨自荊州府江陵以東監利以北沔陽州前後左右諸湖皆受漢水支津至嘉魚縣東北漢陽府西南境分流以入於江漢水之東北岸自京山天門應城雲夢孝感東南至黃

卷三十
州羣水瀦滙亦即古澤皆入漢之水所瀦而又分
流以入於漢水

鄱陽湖所滙諸水 章水源出湖南郴州桂陽縣
東東流入江西南安府界經崇義縣西北又經上
猶縣西南又經南康縣北至贛州府治贛縣西南
有池江自南安府大庾縣經南康合諸水來會至
贛州府西北貢水來會

貢水即古湖漢水源出福建汀州府長汀縣西北

西流入江西瑞金縣界經會昌縣東北有雁門水
自長寧縣來會又西北有梅村江自安遠縣來會
經雩都縣東南有梅川水自寧都州合石城雩都
縣諸水來會西流有潏河合潏江水自興國縣來
會又南有桃江自信豐縣合龍南縣定南廳諸水
來會經贛州府東北與章江會曰贛江

贛江自贛州府城東北經萬安縣東南有皂江自
贛縣來會又西北有遂江自龍泉縣來會經泰和

縣西南有牛吼江自永寧縣來會又東北有雲亭
江自興國縣來會至吉安府廬陵縣東南有廬水
自安福縣合永寧永新諸水來會經吉水縣西南
有恩江自永豐縣來會經峽江縣東南新淦縣西
南有象江泥江自永豐縣來會至臨江府清江縣
東南有秀江即袁江自新喻縣合萍鄉宜春分宜
縣諸水來會經豐城縣西又北分為二支一東北
流有盱江支津

盱江
見後

自建昌撫州二府境來會一

西北流會瑞州府之錦江水

錦江見後

至南昌府西南

合流又北支渠無數連絡交錯入於鄱陽湖

上饒江一名信河即玉山水有二源一源出玉山

東北曰上千溪西南流至廣信府上饒縣東南一

源出廣豐縣東南當浙江福建之界有江山縣水

浦城縣水來會曰永豐溪至廣信府南而合曰上

饒江經鉛山縣北分二派納諸水而合經興安縣

南弋陽縣東南又經貴溪縣西南有須溪來會經

安仁縣東南有白塔河自瀘溪縣合光澤金谿安仁諸縣水經龍虎山來會經餘干縣東南合諸水折西北與盱江贛江支津滙入鄱陽湖

盱江即古盱水亦曰臨川江源出廣昌縣有三支合流經縣南又經南豐縣西南北流經建昌府南城縣東南有新城縣之黎水來會西流有金谿縣水來會又北經撫州府城東有臨水自崇仁縣東北合宜黃縣水來會又西北分支一西流經豐城

縣東至南昌府城西南一北流經進賢縣西南新建縣東北又分二派與西流一派並入鄱陽湖

瑞州府錦江即蜀水一名筠河又名瑞河源出萬載縣西北東流經上高縣西北有藤江自新昌縣合臨江諸水來會經高安縣西有鳳嶺水龍口水來會至南昌府新建縣西南會贛江入鄱陽湖

修水出寧州西南與湖南界之幕阜山東北流有南樓嶺水來會又東北有武寧縣水來會經武寧

縣東南又經建昌縣東南有靖安縣之長溪奉新安義縣之馮水來會分數派會贛江支渠入鄱陽湖

鄱江即古番水源出安徽婺源縣北西南流入江西界經德興縣北又經樂平縣東有大溪自婺源德興縣來會至饒州府治鄱陽縣東南有餘水自萬年縣來會又北有昌江自祁門黟縣經浮梁縣來會又西南有西湖水來會入鄱陽湖

鄱陽湖匯章貢諸水亘南昌饒州南康九江四府
南昌新建建昌德安星子德化湖口都昌鄱陽餘
千十縣之境東北至湖口縣境入於大江

皇朝通志卷三十

欽定四庫全書

皇朝通志卷三十一

地理畧

八

水道

四

太湖諸水

荆溪在宜興縣城南其在城西者曰西溪東曰東溪凡廣德州溧陽金壇諸縣水皆來會東北流至百瀆口入太湖

金線泉河出長興縣西北境東南流至夾浦港入
太湖

合溪即箬溪亦名若溪出長興縣西東流有南溪
來會經縣北運河支渠來會至大沈灣港入太湖
苕溪出孝豐縣南之天目山經縣城東北流經安
吉縣東南分二支而合會諸水又分二支一經長
興縣東南合運河又分二支一支仍入運河一支
與正流合至湖州府城西有餘不溪來會又分二

支一為小梅溪入太湖一會府城東諸水至大錢
湖口入太湖

餘不溪即東苕水其上源曰北溪出臨安縣西北
與孝豐界之東天目山東南流一源曰南溪出臨
安縣西與於潛界之化龍鎮東流與北溪會經餘
杭縣南分二支而合有武康縣水來會北流有小
山河自錢塘縣北界來會經德清縣南有封溪及
後溪自武康縣來會分為三派一東塘河自德清

經歸安石門縣至湖州府城南一西塘河行德清縣境一正流經武康縣東至府城西南並合又分支津一經嘉興府西北境又經吳江界入運河正流會苕溪水至大錢湖口入太湖

七十二淩在烏程縣者三十有八在長興縣者三十有四並入太湖

太湖即古震澤亦名具區又名笠澤五湖環二省常州蘇州湖州三府宜興荆溪武進陽湖無錫金

匱吳縣長洲吳江震澤長興烏程歸安十三縣地
下流入海最大者曰吳淞江曰婁江

吳淞江自太湖分流出吳江縣東南經吳縣合龐
山湖經崑山縣西又經青浦之澱山湖入松江府
華亭縣境合趙屯大盈顧會崧子盤龍五浦水入
上海縣西北至黃浦合嘉興平湖縣水及蘇州澱
山湖匯為三泖湖東北入於海

婁江今日劉家河自太湖分流經吳江縣西北至

蘇州府城西入運河又東受陽城巴城諸湖水經崑山縣南又經太倉州城南諸水悉會至劉家口入於海其別支為七鴉浦自崑山合常熟諸水至太倉州北入於海

浙江諸水

浙水有南北二源北源徽江亦曰新安江出徽州府歙縣西北與黟縣界之黃山至府城西南有東界河自績溪縣來會又南有南港河自黟縣經

休寧縣合婺源縣之率山水來會入浙江嚴州府
界南流經淳安縣南又南有龍溪自遂安縣來會
經建德縣西有艾溪自壽昌縣來會經嚴州府治
建德縣南南源來會南源有二一曰衢港一曰
婺港衢港亦曰信安江源出開化縣北二支合流
經縣東南南流經常山縣西北至衢州府城西有
文溪自江山縣南仙霞嶺來會經龍游縣北有笋
箴溪自壽昌縣桃溪自遂昌縣來會又東北有湯

溪縣水來會又東北至蘭溪縣南婺港來會婺港亦曰東陽江出東陽縣東之大盆山西流有小溪來會經縣城北又西經義烏縣城南有荆浦溪來會又西有慈航溪來會至金華府城南有梅溪亦曰縉雲水自縉雲縣東北合好溪水經永康武義縣合諸水來會西流分二派南支先入衢港北支至蘭溪縣南與衢港會北流至嚴州府城東南與新安江合 二江既合北流過七里瀨經桐廬縣

東南有桐溪水自於潛昌化經縣界來會至富陽
縣界有新城縣溪水來會又東北有湖溪自浦江
縣經富陽縣界來會至縣城南有篠嶺水來會折
北流東岸經蕭山縣境有浦陽江即浣江自浦江
義烏諸暨山陰縣境合諸水來會入錢塘縣南境
折東北流至杭州府城東南南岸即蕭山縣境又
東北經蕭山縣北境又東北至龔山與北岸海寧
州境之赭山相對如門入於海

西湖在杭州府城西源出諸山中匯為湖周三十里其水引貫城而東出灌海寧州田

三江口在紹興府北山陰會稽蕭山三縣諸水之尾間也腹曰鑑湖其源無數在會稽東南境者曰東溪合若耶寒溪上竈諸水在山陰西南境者曰西溪合相溪餘支溪諸水在蕭山境者合運河西河塘河湘湖諸水俱匯至三江閘入於海閘稱三江從古名自山陰築臨浦壩浦陽江已入於浙會

稽築壩壩曹娥江自入於海東西兩江俱不從此
入海也

曹娥江即剡溪源出天台及東陽縣境經新昌縣
西北至嵯縣南有西港來會東北流有新昌寧海
奉化三縣水合而來會又北流東為上虞界西為
會稽界又東北有夏蓋湖水來會入於海

甬江即鄞江有二源南源曰姚江出餘姚縣西南
經上虞縣南又經慈谿縣南有藍溪文溪諸水來

會有二壩分為南港東港北源曰奉化江出奉化縣西南經縣城東南有東剡溪來會北流分二支北支與慈谿二壩下流會至寧波府城南與南支合又東北與姚江之南港東港先後並會經鎮海縣南又東入於海

靈江亦曰澄江出天台縣西南合天台諸水東北流經臨海縣西北有仙居溪水自仙居縣南合縉雲界之馮水師山水永康界之蒼嶺水天台界

之白水來會經台州府城西有臨海東境諸水來會又東南黃巖縣之永寧江來會又東入於海

甌江亦曰永嘉江出處州府龍泉縣西南經城東又經雲和縣北有遂昌松陽二縣之大溪來會至處州府西南有虎踏溪自宣平縣來會又東有縉雲縣溪來會又東南有臘溪自青田縣來會經青田縣西北有彪溪自景寧縣來會折東南入温州府永嘉縣境至府城南有楠溪自仙居縣來會又

東有永寧河來會經樂清縣西南又東入於海

閩江諸水

閩江即建江有三源東源建溪出浦城縣北南流
經縣城東南有新溪來會又南有臨江溪來會經
建陽縣東至建寧府治甌寧縣西北有崇溪自崇
安縣合武彛山九曲溪經建陽合邵武縣諸水來
會東南流有東溪自浙江龍泉慶元經松溪政和
二縣來會至延平府東北南至延津西源富屯溪

出光澤縣西東流經邵武府城北又東南經順昌
縣西有將溪自將樂縣會建寧泰寧二縣諸水來
會東流會沙溪西南源沙溪出寧化縣西東南流
有淮溪自長汀縣來會經清流縣西又東南有文
川溪自連城縣來會經永安縣西東北流有坊溪
沙洋溪自歸化縣來會經沙縣西南至延平府西
北境與西源富屯溪會東南流至延津與東源建
溪會東南流有尤溪自大田尤溪二縣合諸水來

會經古田縣南又經閩清縣東北至福州府侯官縣西分二派曰南臺江曰陶江支浦相錯南臺江東流經福州府城南陶江東南流有雙溪自德化縣經永福縣來會東流二江復合有福清長樂縣水來會經長樂縣北入於海

興化府江出仙遊縣三溪合流至府治莆田縣西分為二派而合東南流入於海

晉江出永春州西北經州城南又經南安縣西北

有安溪水自安溪縣來會至泉州府治晉江縣境
東南流入於海

九龍江出寧洋縣西北經縣南有樂溪來會經漳
平縣西北有雁石溪自龍巖州合諸水經漳平縣
來會經漳平縣南有感化溪永福里溪來會入漳
州府治龍溪縣北南流經長泰縣西經漳州府城
西南有南溪合南靖縣諸水來會經海澄縣西又
東流入於海

汀水亦曰韓江出汀州府長汀縣南流經上杭縣
北曲折流有永定縣溪水來會西南流入廣東界
經大埔縣北有小靖溪自福建永定縣來會又西
南有大靖溪自平和縣來會其西有大溪自福建
武平合鎮平平遠長樂興寧諸縣水及嘉應州水
來會西南流有土槎溪桐溪自饒平縣來會經潮
州府北有揭陽江支津水來會

揭陽支
津見後

至澄海縣

西北分二派先後入於海

漳水出漳州府平和縣西南及漳浦縣西之靖龍山東南流經漳浦縣南又東南合二小水入於海揭陽水亦曰琴江出永安縣東南流經普寧縣西北有揭陽山水來會又東有鯉湖溪來會經揭陽縣南分二派一支至潮州府治西南又分二派皆入於汀水正支南流有惠來縣水來會至潮陽縣北入於海

粵江諸水

粵江有三大源 東江即龍川水出江西安遠縣
南山入廣東和平縣境有鶴子水亦自安遠縣來
會又東南有尋都江自長寧縣來會又西南會和
平縣左右諸溪經龍川縣城東南又經河源縣東
北有新豐江自連平州合諸水又合長寧縣之羅
紋水來會又西南有攬溪自永安縣來會至惠州
府東北有淮水自歸善縣合諸水來會經博羅縣
西南又經東莞縣東北有增城龍門縣水新安縣

水並會經東莞縣城北又西經番禺縣東至廣州

府城東南有北江支津合從化花縣水來會

北江支津

見後又西會北江西江為三江口入於海

北江即湏水出南雄府保昌縣北之梅嶺曰大庾

河至府東北有保水合昌水來會西南流經始興

縣東北有始興溪合諸水來會又西南有錦江自

仁化縣來會經韶州府治曲江縣東北有樂昌縣

水即濠水自湖南宜章縣合諸水來會又西南有

漠溪自乳源縣來會宣溪自陽山縣來會經英德縣東南有翁江自翁源縣來會又西南有滙水自陽山縣合連山縣連州諸水來會經清遠縣西分為二派一支曰綏江經三水縣分一支與西江支津會又東北至廣州府城西會西江正支東流有花縣水從化縣水來會又分二派東派會從化水於石門南為巨浸分支津會東江正支於府城西南會西江及東江水又南入於海

西江有桂黔鬱三源 桂江即灘水源出廣西桂
林府興安縣南北流至縣東南為分湘灘灑折西
南有銀江自靈川縣北境來會經縣東南至府治
臨桂縣北分而復合有馬溪來會西南流有相思
江合永寧州永福義寧縣諸水來會經陽朔縣東
北有縣溪來會經平樂府北有龍江自恭城縣來
會又南有荔水自荔浦縣合修仁縣之修江來會
經永安州東北又經昭平縣北有金芝巖東水來

會又東南有蒼梧縣水來會至梧州府城西黔江
鬱江來會東流至廣州府會湏江龍川江入於海
黔江即北江右江又有三源曰柳江曰北盤江曰
南盤江 柳江出貴州永從縣西生苗山中入縣
西界曰福祿江入廣西懷遠縣境東南流有水自
永從縣西南境來會又東南分二派至懷遠縣北
而合經融縣東北曰融江經羅城縣東北至柳城
縣西北有龍江自慶遠府會貴州獨山州荔波縣

水及南丹州河池州思恩宜山忻城天河諸縣水
來會曰柳江至柳州府馬平縣西南有洛清江自
雒容縣合永富縣諸水來會經象州北而南有都
泥江即兩盤江來會 北盤江出雲南霑益州北
境經可渡橋受貴州威寧州水入貴州界伏流復
出經安南縣北有拖長江自普安州經普安安南
二縣來會始曰盤江經永寧州西境有阿黑河合
拒馬河自安南縣來會又南有馬軍河自南籠府

來會又東有寧谷河自安順府合鎮寧永寧二州
水來會經南籠府東北又南入生苗界東南流入
廣西泗城府北境又東南南盤江來會 南盤江
亦名紅水江出雲南霑益州西北經州城南有磨
刀溪自曲靖府南寧縣來會經南寧縣境又經陸
涼州東南湖澤中西北流經宜良縣東北又經路
南州西經澂江府治河陽縣東有白龍潭水自路
南州來會又西有仙湖受江川縣水來會經彌勒

縣西寧州東北有小曲江合新興州崑崙城西通
海三縣及寧州水來會又東南有水自彌勒縣來
會經阿迷州北有蒙樂河自臨安府建水縣合石
屏州之黑龍湖水來會折西北經廣西州南境廣
南府西北境又東北至廣西西隆州界有馬別河
自開化府北山經廣南府境來會又西北至羅平
州東南有九龍河自羅平州合師宗縣水霑益州
水平彝縣水來會折東流有清水河自廣南府北

境來會又東北有河自普安州普安縣來亦名馬
別河經南籠府境來會經泗城府西北境北盤江
來會 兩盤江既合總名曰紅水河東流經東蘭
州東北又經那地州西北經東蘭州東又東南經
猺山中百餘里又東南經思恩府北安定土司南
有蘆江來會經忻城縣西南有那龍江刁江自那
地州來會經遷江縣西北有青水江合上林縣賓
州諸水來會經來賓縣西南又經象州西南柳江

自州西來會自此而下總名曰都泥江經武宣縣
西北至潯州府治桂平縣西北境分為二派一南
流一東北流皆會西來之鬱江自此以下總曰潯
江經平南縣西南有白沙江自容縣來會經藤縣
西有蒙江自永安州合諸水來會又有劔江合北
流容縣岑溪三縣之水來會又東北至梧州府蒼
梧縣西又東桂江自昭平縣來會而東入廣東
界

鬱江即南江左江亦有二源北源曰西洋江南源曰麗江 西洋江出廣南府治寶寧縣西北經府城西東南流入廣西西林縣界有同舍河自廣南府經西林縣合諸水來會又東南有者郎河自土富州來會經泗城府南又經鎮安府南有泗城府北山水來會經奉議州北有水自田州來會經上林縣西北有泓滄江自鎮安府合向武都康侏倫諸州水來會經隆安縣北有歸德土州水來會又

東南有龍牀江自萬承土州經永康州來會又經
州境北有馱蒙江自思恩府經武緣縣合諸水來
會又東南至南寧府治宣化縣西之合鎮江麗江
來會 麗江一源出歸順州北經交趾界入下雷
州西境有駁來水合流珠水來會經安平州北有
龍英州水來會經太平州北有龍水自養利州合
萬承州茗盈州水來會經太平府西北是為北源
一源出交趾地流入廣西上下凍州西經龍州南

有憑祥州水來會又東南有水自思州來會折東
北至太平府西是為南源二源合東流有水自江
州來會又東有水自左州忠州來會經新寧州西
北有水自羅陽土縣來會又南至合鎮江西洋江
來會 二江合為鬱江經南寧府西南有伶仃水
自崑崙關來會經永淳縣西北又經橫州西南有
橫澆江洪流江自廣東境來會經興業縣西北有
武思江自貴縣來會經貴縣西南又東有橫眉江

自鬱林州來會至潯州府治桂平縣西南又東黔江支津來會又東北黔江正派來會

黔鬱二江既會於潯州府曰潯江又東會桂江於梧州府入廣東界經封川縣西北又經西寧縣北有武倉水自羅定州來會經德慶州南有端山水來會又南有連州河自羅定州來會經東安縣北至肇慶府治高要縣西南有羅銀水合新興州水來會又東北有賀江自連山縣合陽山水經賀縣

富川縣開建縣合東安縣水經懷集縣廣寧縣四
會縣合諸水來會稍東分二派一東流會湏江之
支津經三水縣南至廣州府西一東南流經高明
縣東北又分支津二於新會縣東北順德縣南先
入於海正派東北流至廣州府西南會東派滙為
巨澤湏江及東江龍川水並來會又南至大通灣
入於海

潭江出恩平縣經開平縣南有龍鎮河自新寧縣

來會至新會縣東南入於海

陽江出羅定州東南經陽春縣北又經陽江縣西
北東流入於海

竇江出信宜縣東北經高州府治茂名縣東北又
經化州東北有羅江來會又東有赤嶺水自電白
縣來會經吳川縣西入於海

南廉江出廣西陸川縣南流入廣東界經石城縣
北又經遂溪縣西北入於海

廉江出廣西鬱林州境經陸川縣北有興業縣水
來會經博白縣西北西南流入廣東界經廉州府
治合浦縣東北有白沙江來會又西南有武利江
自靈山縣合諸水來會至府城西南入於海

欽江出欽州東北至欽州東南有魚洪江合鳳凰
江來會南流入於海

雲南諸水

河底江出大理府南境一源自雲南縣西北合趙

州東南水蒙化廳北水東南流一源自趙州南境
經蒙化廳西而合東南流經景東廳東北有馬龍
河出鎮南州經楚雄府南境南安州西南境來會
至元江州北有羊溪自富民縣經羅次安寧祿豐
易門新平合廣通南安諸州縣水來會東南流至
元江州北東北流有新平縣水合嶠峨諸水來會
又東南入安南國界

李仙江即景東河出蒙化廳東南經景東廳北東

南流有鎮沅州水來會又南流經威遠廳東又東南有阿墨江合諸水來會又東南入安南國界

瀾滄江源出西藏喀木境曰拉楚河行藏地曲折數千里入雲南麗江府界分二派一曰漾備江

見後

一南流經雲龍州西北有沘江來會經永平縣西又經永昌府東又東南經順寧府北又經雲州北境漾備江來會經景東廳西又經順寧府南又西南有棘蒜江合諸水來會又東南有巴景河康郎

河來會又南有猛賴河自普洱府來會又東南有
羅梭江來會又東南入阿瓦國經老撾安南入於
海

漾備江即古葉渝水瀾滄之沱江自瀾滄分支東
南流經劔川州西又東南有東劔海自麗江府合
鶴慶州諸水來會經浪穹縣西又經鄧川州西南
至大理府治太和縣西北又東南有洱海自府城
匯浪穹鄧川趙州諸境水西南流來會南流有雲

龍州水經永平縣來會經蒙化廳西至雲州北復
與瀾滄江會

潞江源出西藏衛地曰哈喇烏蘇經喀木境共行
三千餘里入怒夷界曰怒江南流入雲南麗江府
界曰潞江雲南西北以此水為邊共五百餘里南
流至永昌府保山縣境南流有南甸河自灣甸土
司合永昌府河及鎮康土司水來會又西南經騰越
州東入阿瓦國界

龍川江源出西蔵喀木境曰薄蔵布河入雲南騰越州界東南流經龍山土司東有芒市河來會西南流會諸水入緬甸界

檳榔江出騰越州西北境獠獠界山東南流有大盈江自騰越州北合諸水來會又西南有盞達河來會又西南有曩送河自巨石關來會又西南有臘撒河來會又西南入緬甸界

新疆伊犁諸水

臣等謹按西域新疆在甘肅省之西西藏之北廣袤二萬餘里

皇上聖武丕昭汎濛入化天山南北列枝興屯資灌溉之饒腴控襟帶之雄勝水道所在皆一一可以指數今考山南回部諸水即大河初源自葱嶺和闐數大源及北山諸源皆匯入羅布淖爾入為大河已見河水卷中茲不重述惟山北諸水以伊犁河為最大自巴勒庫勒烏魯木齊已設鎮西府迪化

州隸於甘肅省水泉濬發不一以無經流大川可
指名者故不復條述今序次伊犁東西路水謹遵
欽定輿地全圖

欽定皇輿西域圖志所列諸水自東而西載於篇中以
昭

聖朝疆理無外之盛軌焉

赫色勒巴什淖爾源出伊犁東路額爾齊斯嶺之
南曰布拉干河西流有青吉勒河來會又西匯於

赫色勒巴什淖爾

烘和圖淖爾源出伊犁東路額爾齊斯嶺之西北
曰額爾齊斯河西北流有哈喇圖河來會又西有
奇喇河來會又西有博喇濟河尼斯庫河來會北
流匯於烘和圖淖爾淖爾西北有昌吉斯河柴羅
爾河合北額爾齊斯河來會在塔爾巴噶台之東
境

額彬格遜淖爾源出迪化州境東源為呼圖克拜

河西源為瑪那斯河並流而匯於淖爾

布勒哈齊淖爾在庫爾喀喇烏蘇之西源出天山
北麓曰庫爾河北流而西有濟爾噶朗河來會又
西有額布圖河來會其北有綽爾河來會匯於布
勒哈齊淖爾淖爾之西有晶河北流來入又西有
鄂拓克賽里河會數水又會庫色木蘇克河東流
來入其西有裕勒雅爾河額敏河自為經流不入
淖爾又有阿拉克圖古勒淖爾合諸小水儲蓄成

澤

伊犁河出天山北之渾都賴嶺合諸水東流折而北有搭拉錫克河來曾經伊犁城曰伊犁河北行有空格斯河自東南境來會有哈什河自東北境來會折而西北合察罕烏蘇阿里瑪圖河諸水又有策集河薩瑪勒河奎屯河並會北流會阿斯哈嶺以北諸水折東北匯於巴勒喀什淖爾淖爾之北為哈薩克界其東有愛呼斯河合必齊干河來

入東南有察林河合摩垓圖河來入

圖斯庫勒在天山木素爾峯北羣源競發環集而
潞於庫勒其大者曰濟爾噶朗河曰招哈河曰哈
喇河並滙自西北流出為吹河受薩勒齊圖烏蘭
烏蘇阿爾察克圖察罕烏蘇諸水又西北有和爾
袞河合墨爾根河古爾班哈納圖河自南來會又
西北滙於和什庫勒

塔拉斯河源出天山額得墨克嶺之北西北流有

古爾班哲爾格河合諸水自北來會又有烏可克
嶺水自南來會又西北有哈喇布拉河自西南來
會北流有哈拉河合北山數水自東來會西北流
經塔拉斯地匯為淖爾是為伊犁之極西境其西
為右塔薩克界

皇朝通志卷三十一